

Persatuan Bahasa Mandarin Sumbang Buku.



Pekan, 24 Februari – Baru-baru ini telah berlangsungnya majlis penyerahan buku Bahasa Mandarin oleh Persatuan Bahasa Mandarin (MLS) UMP kepada empat perpustakaan sekitar negeri Pahang bertempat di Auditorium Perpustakaan UMP Pekan.

Majlis penyerahan telah disempurnakan oleh Ketua Pustakawan UMP, Haji Ruslan Che Pee kepada Sekolah Jenis Kebangsaan Cina (SJKC) Yoke Hwa, SJKC Kemasul, SJKC Kong Ming dan Perpustakaan Perbadanan Awam Negeri Pahang.

Dalam ucapan perasmiannya, Haji Ruslan berkata, pihak Perpustakaan UMP amat menghargai kesungguhan mahasiswa dalam usaha mengumpul buku-buku untuk menjayakan program serahan buku kepada Perpustakaan luar UMP. Pihaknya sentiasa menyokong aktiviti sebegini dan sentiasa berbesar hati menerima sumbangan bahan-bahan bacaan untuk Perpustakaan UMP.

Pada hari ini, sebanyak 1981 buah buku telah berjaya dikumpulkan dan buku-buku ini akan didermakan kepada empat perpustakaan yang terdiri daripada Sekolah Jenis Kebangsaan Cina (SJKC) Yoke Hwa, SJKC Kemasul, SJKC Kong Ming termasuk Perpustakaan Perbadanan Awam Negeri Pahang.



Sementara itu, Pengarah program, Thor Wei Soon, berkata amat berterima kasih kepada semua yang terlibat dalam pengumpulan buku-buku ini sehingga jayanya program ini.

"Projek pengumpulan buku terpakai ini telah disertai oleh mahasiswa UMP bermula pada bulan Disember 2016 sehingga Februari 2017. Walaupun tempohnya hanya dua bulan, namun kami berjaya mendapatkan 1981 buah buku dan disumbangkan kepada yang memerlukan. Diharapkan buku-buku ini dapat memberi manfaat kepada pembaca di Perpustakaan masing-masing," katanya.

Selain itu, pengumpulan buku terpakai ini juga merupakan satu usaha dalam mengurangkan pembuangan buku terpakai serta mengamalkan konsep 3R (*Reduce, Reuse & Recycle*). Program ini merupakan anjuran Persatuan Bahasa Mandarin (*MLS*) dengan kerjasama Jabatan Hal Ehwal Pelajar & Alumni (*JHEPA*). Turut hadir Pengarah Perbadanan Perpustakaan Awam Pahang, Hajah Faridza Jaafar, Pustakawan Perbadanan Perpustakaan Awam Pahang, Maria Hamzah, Pengetua Sekolah Jenis Kebangsaan Cina (*SJKC*) Yoke Hwa Kuala Pahang, Lim Lee Chern dan Ketua Jabatan Mandarin *SJKC* Kok Min Kuantan, Lim Yu Yan.

Berita Disediakan oleh Siti Sarah Mohamad Rajimi dan suntingan oleh Bahagian Komunikasi Korporat

Posted By : SITI SARAH BINTI MOHAMAD RAJIMI Date Posted : 24-02-2017, 14:38:28